

D'LABRA

BLOCHZIEHEN

20



00

*Kinderfasching*

**FLIESS**



Als Briefträger bisch a Synonym  
für Tratschweib´r und für Plaudertaschla  
weil viel d´rfrogsch, ou anonym  
und hearscha´s im Gebüsch lei raschla

Dia Leit sei skeptisch und verschlossa  
wenn pikanta Gschichtla I will d´rfroga  
döis saggrisch mi hat v´rdrossa  
hat m´r auf a Moga gschloga.

Göig dia Gastritis geits kua Mittl  
hat d´r Doktor zu miar gsöit  
d´rweil er gwualt hat in seim Kittl  
nou a Märchen miar d´rzählt.

Mei Retti sei zwitschrata Vöigl  
denk on Politik´r mit Pfiff  
untr andrm an den Karli Schlögl  
und sei Idee vom Lauschongriff.

Togelong schleich I iatz umma  
in geheimer Mission, wia d´r Tschäms Bond  
kimm´r voar wia gonz an Dumma  
wenn I pick an jed´r Wond.

Dia Tortur hat I miar kenna spora  
wia oft hon I mi sou scheniert  
viel tua I ja gonz leicht erfohra  
weil jeder sei Händi ausprobiert.



Ob One, ob Max, ob Telekom  
d'Leit dia mi föscht umzingla  
öis kimmt miar vir wia unt'r Strom  
iatz hear I 's bei miar lei mia klingla.

M'Feind, m'Nachbor, und d'r Tant  
a kluas Malör isch ou passiert  
ob'r öis isch ja gor kua Schand  
wenn dös Gerücht ou schnell grassiert.

Fingrspitzlarisch I muaß d'rzöhla  
was in 4 Johr labrisch's isch passiert  
darf dia Arma nit z'arg quöila  
weil nit I bin pragmatisiert.

Ab'r auf a Norrabonus tua I hoffa  
wenn I dorf enk sou manch's berichta  
und fühlt si uar z'stark betroffa  
muaß I 's nägscht mal anders dichta.



Oft denk I on dia Zeit zrug  
wou ma si hat im Gasthaus troffa  
zum Huangart und zum Glugg-Glugg-Glugg  
hot wia a Birstabind'r gsoffa.

Heind bleibt lar so mancher Hock'r  
varmuatascht fast a Geistr'stadt  
mit Glick findasch abr ganz locker  
dia Goldgräb'r in dem Planquadrat.

Mit dem Alkomat sei miar a Mocht  
heind im Gallmigg weard wied'r gschürft  
miar finda eppas sall war decht g'lacht  
weil im Zoll uar wied'r schlürft.

Lass di zahla, er zur Kellnerin faucht  
I muaß huam, sinsch krieg I Schlög  
ear sein Nochbor nou als Stitza braucht  
weil ear torkelt schua ganz schrög.

Kua Problem macht Ihm d'frisch Luft  
z'rstreit vam Kollega dia Bedenka  
weil I kann im ergshta Suff  
mei Autoli nou gonz leicht lenka.

Quietschvergniagt fohrt ear iatz lous  
hat nou schnell a Liadli g'sunga  
hint'r dear Brugga wos isch do blouß  
wear'd do gor a Kella g'schwunga?

Döis isch mei Frau denkt ear schockiert  
drum düst er uafoch do vorbei  
mit Vollgas v'rzweifelt er probiert



d'rhuam z'sei und sall holt glei.  
Döis sei Schandi, klärt sei Sozius au  
do kimmt er earsch recht in's Schwitza  
sou fohrt ma lei mia wia die Sau  
ear will voarna sei in Schitza.

D'rhuam weard parkt dear Firmabus  
begleitet vom a Blauliachtschei  
in d'r Hektik krocht an Schuß  
und uar schreit, bleib stia, du Schwei

Weil dia Haustür isch v'rschlossa  
weard an Krimi iatz entfocht  
ins'r Mannli kämpft unverdrossa  
hupft üb'r d'Maura, rennt in d'Nocht.

Kopfigrorsch und querfeldei  
hot ear nou sei Glick v'rsuacht  
mecht iatz holt an Windhund sei  
bis ear si da Fuaß verknackst – v'rfluacht

Guatr Rot isch'm mia wia tuir  
im Pilla ear si schnell versteckt  
in dem Knöch'l brennt's wia Fuir  
sou hot dear Hund ihn glei d'rschmeckt.

Abg'fahrt weard ear nou zum Posta  
d'ron denkt ear in seim Schwips  
wos weard dia Aktio mi koschta  
kuan Fiahrarschei, d'rfür an Gips.

I muaß iatz gia zum nägschta Haus  
bei dear Gschicht, do mocht's mi bofa  
hat decht dear Vogl Strauß



gscheid'r im Tierheim g'schlofa.

A Mordsspektakl isch jeds Johr  
dia Streifabfohrt dunta in Kitz  
viel Publikum isch do fürwahr  
wenn sie ochasausa wia an Blitz.

Mit Mausefalla und Hausbergkanta  
döis Abfahrtsrenna isch an Hit  
und weil d'Österreicher g'winna kannta  
dia Show entgiah latt ma sie nit.

Dia gonz Nation vor'm Fernseh hockt  
und druckt si gwieß dia Dauma wund  
ob'r a echt'r Fan dear weard entlockt  
noch Kitz zu döina wilda Hund.

Sou hot si ou a Fließer denkt  
ear mecht sei do leif dabei  
drum ear si im Zug v'rsenkt  
weil als Eisabohner fohrt ma frei.

Noch dem Renna geah't's retour  
in Innsbruck mocht dear Zug long halt  
a halba Stund schua nach sei'r Uhr  
ihm dia Soch gach numma g'follt.

Warum miaßa miar oli nou worta  
es ihm durch sei Grintli schiaßt




dia Lok hat sölla long schua starta  
zum Nochschauga ear si drum entschliaßt.

Was ear iatz sicht kann ear it glouba  
kua Lok und lei mia drei Waggon  
hoba dia mi gar v'rschoba  
sou schnell geat döis schua bei d'r Bou?

D'r Zug isch fort, ear do nou steat  
abg'hängt hoba ihn dia Kollega  
daß ihm amol sou geat  
hat ear gar nia trouma möiga.

Zum nägschta Haus tua I iatz wota





Dia Fliaßer Musi spielt manchs Konzert  
im Pavillon und ou bei Festla  
und daß es nit longweili weard  
verlassa sie schua amol dös Nestla.

Aufgspielt weard in Pfunds gonz heiter  
mit Klarinetta, Pauka und Trompeta  
an Marsch, an Walzer und sou weiter  
es geat fost zua, wia bei ara Feta.

A leschta Zuagab, iatz isch Schluß  
g'feiert weard schua nou mitanond  
und wia ma insteigt in den Bus  
g'fahlt hot do an Musikont.

Wou kannt dear sei, weard spekuliert  
hockt holt numma auf seim Platz  
hat ear gor dia Frau v'rfahrt  
verbringt dia Nocht decht bei dem Schatz?

Dia Antwort weara miar nia wissa  
d'rfroga tuat ma lei uas gwieß  
am nächsta Tag siecht ma ihn beflissa  
macht Autostopp in Richtung Fließ.

Mit Waldhorn und im Musigwond  
streckt ear aus da rechta Dauma  
a seltnar Tramp am Strossarond  
dia Autofohrar Bauklötz stauna.

zum nägschta Haus marschier I glei  
druck nou d'Falta aus meim G'wond  
stolz kann d'Fliaßer Musi sei  
auf den moderna Stroßamusikont



Z'Fliaß isch köma uar ans Ruad'r  
hat koschtat ab'r viel Substanz  
fahrt in Urlaub mit seim Bruad'r  
um fit zum weara wied'r gonz.

Mitfohra miaßa ou dia Frau  
drum hat ma schnell dia Koffer packt  
am Strond weard ma si nied'rhaue  
wenn d'Sunna auf Kroatia lacht.

Dia Stimmung besser sei nit kannt  
d'slowenisch Grenz isch numma weit  
druckt m'Zöllner d'Paß in'd Hond  
um z'vrliara wiani Zeit.

Ab'r warum schaut dear sou streng  
prüft sou long döis Dokument  
für a Frau weard's ganz schia eng  
's Ablaufdatum hat sie v'rpennt.

Kua Ausred galtat, kuan Pardon  
ib'rzocha hat's dear, dia 5 Johra  
dia EU-Außengrenz isch Endstation  
huamwärts muaß sie wieder fohra.

Auf d'r BH weard's korrigiert  
Richtung Süda d'r Steara wied'r schaut  
beim zwoata Mol da louft's wie g'schmiert  
drum reicht's decht nou für a brauna Haut.

Voar dem nägschta Haus denk I miar grod  
was macht dear Monn für dumma Socha  
wenn d'Frau schua soviel Huamweah hot  
kannt ma bei ins ou Urlaub mocha.



Wie dia Stones in Imst tia rocka  
an echta Fan 's bis in Zeacha juckt  
kuar bleibt do in d'r Stuba hocka  
und flippt bei dem Sauwetter wie v'ruckt.

Für Jagger, Richards und Kollöiga  
ou an Jungbaur hat si angaschiert  
d'r Baurajazz isch ihm nia g'löiga  
an Rock'n Roll ihn fasziniert.

Dear Rhythmus geat ihm schwar ins Bluat  
gonz woach sei schua olla Glied'r  
und ou sinsch isch ihm nit guat  
im Zug drum legt sie ear kurz nied'r.

Nu 's Traummännlein kennt gar kua Gnod  
tuat ihn mit g'sundam Schlaf grad möschta  
ear kuan Riarar g'macht in Londegg hot  
dia Fahrt geahrt weiter Richtung Weschta.

An leschta Quietsch'r, Endstation  
do isch dös Beirli ou d'rwocht  
rieblat in da Ouga nou  
schaut entgeistert in dia Nocht.

V'rfrachtat hat man bis ins Ländle  
drum riaft ear on sei Frau zum Houla  
Nu dia söit: „Mei liab's Männle  
du spinsch komplett, drum bleib miar g'stoula“.



Mit Taxi ear retour kutschiert  
schua briascha weard dös Viech im Stall  
im Kopf zwar nou a Biescht loschiert  
was klopft und brummt auf jeden Fall.

Da Kollöiga tuat ear sou d'rborma  
hoba g'fuatrat, ausg'mistat und schua g'molcha  
sinscht hat ear kriagt an Sporz, an worma  
sou darf d'rhuam ear weiterschnorcha.

Zum nägschta Haus I d'Poscht v'rfiahr  
tat ou liab'r Taxi fohra  
nu wohn I nit in Zone vier  
drum muaß I miar den Luxus spora.



Daß Fliab a Kuaardoarf söt lei sei  
wölla miar schua gar nit glouba  
nuia Thoja sei schua fei  
im Zondersch und ou z'Goglas douba.

Weil's Geheimnis va ma guata Kasli  
sei it lei d'Hirt und Senner  
a safti's und a würzi's Grasli  
braucht's ou, sall woab a jed'r Kenner.

Drum wichti isch dös Frona schua  
daß gongbar bleiba Weg und Pfad  
d'r Alpausschuß, dear geit kua Ruah  
bis alls ou glei sei Oardni hat.

A Stuaplatta nou an Steig v'rsperrt  
do aucha Richtung Pillerwiesa  
d'Muschglkraft isch glei v'rdörrt  
für sou an Mugl breicht's ja Riesa.

Drum hat ma g'faßt glei den Beschluß  
am beschta nimmt ma Gelatin  
a Boahrloch und an rechta Schuß  
sou fliagt dös Hindernis dahin.

An Schußmuascht'r hat schnell si g'funda  
und dear Stua weard schia POLIERT  
dia 2 sei z'rugg nach wiani Stunda  
nachdem dia Soch isch detoniert.



Nu da Falscha hoba sie entzweit  
hoba nou a mal do aua miaßa  
iatz frog I enk es liaba Leit  
isch dia Gschicht it ou zum Schiaßa?

Zum nägschta Haus schleich I dahi  
fluach nou gach, o Gottfried Stutz  
warum tuat ins'r Gmuapartie  
sou gar nuit für den Umweltschutz.



Wenn mit dem Auto auf Londegg fohrsch  
kimmsch oftramol schua arg ins fluacha  
weil dia Parkplatznoat,jo dia isch ...leschti!  
stundalong oft muaß ma suacha.

Am Schenta baut ma drum varuckt  
a Tiefgarasch, sou hell und billi  
beim Schronka weard auf's Knöpfli druckt  
sou spuckt's a Kartli aus gonz willi.

A Frau dia Technik kriagt nit spitz  
an Hunderter drum hot sie g'foltat  
zwängt döis Scheili in dö Schlitz  
daß es da Automat foscht spoltat.

Noggla tuat zwar schua der Schronka  
nu Kartli kimmt kuas für dia Garasch  
an Schandi mocht si gach Gedonka  
was ticknat hot da f'r a'Bagasch.

Döis Wearkli weard ausanond'r gschrauft  
dear Hunderter ou böglat glott  
und 's Frauali hei's auf d'rschnauft  
obwohl Wechselgald si nou kuas hot.

Beim nägschta Haus muaß I iatz parka  
kua Parkuhr zwar I bei miar hon  
probier I 's halt mit Stempelmarka  
weil I dia sinsch numma picka kann.



Ing'loda hat ma d'Fliaßer Musi  
nach Bempflinga im Schwobalond  
hat long mit dena schua a Gspusi  
a Pflichttermin für jeden Musikant.

V'ronstolta ja a Riesafescht  
zum 75er Jubiläum  
a Fohnaweich zu guat'r lescht  
paßt haargenau zum Drumherum.

Essa, trinka, lushti sei  
a Wochenend gonz ouna Soarga  
munda tuat ja Bier und Wei  
und 's Platzkonzert isch earsch moarga.

D'r Auftritt naht am nägschta Tog  
nu uar, dear riart si nit vom Fleck  
summst und quiert, dös isch a Plog  
hon kua Lederhousa im Gepäck.

A Bempflinger Housa ausprobiert  
zwängt nou zua da Lederlatz  
halb gequält er musiziert  
weil d'r Notastander hat kuan Platz.

Zum nägschta Haus I rasch marschier  
sowas kann mi nit entzücka  
stirbt dear Patriotismus aus  
wenn miar ins mit fremda Gwandla schmücka?



Döis Klubrenna vom Schiklub Fliaß  
all Jahr wied'r isch an Hit  
foscht olla sei do auf da Fiaß  
mocha beim Kampf ums Stockerl mit.

Da louft im Vorfeld manch a Wett  
wieviel Sekunda wear I ihn putza  
da Brata macht nu 's Wachs nit fett  
lei hart's Training kann da nutza.

Am Krahberg doba in d'r Fruah  
weard ja schua viel Schwoaß v'rgossa  
ma ruacht üb'r Stock und Stuah  
mecht nit pflöiga 's Gegners Rosa.

Sou ähnli hoba 2 ou denkt  
mit'm Lift geat's schnell bergau  
dia nuia Schi ins Tal glei lenkt  
zischa ocha wia a g'sengta Sau.

Voar dear Pista kuan Respekt  
muaß dem ondra imponiera  
it daß dear Gegner Bluat nou leckt  
geistrt's uma in da Biara.

Var lauter Rücksicht auf d'Konkurrenz  
isch ma lei mia kollidiert  
a paar Salti für dia Fans  
voar ma nou diá Schi v'rliert.



Uar d'rnoch im Schnee drin steckt  
wia an Korka in d'r Flascha  
d'r ond'r halt da Indruck weckt  
wia an Hud'r nach m Wascha.

Im nägshta Haus mecht I nit wouhna  
fürcht mi voar dem wilda Hund  
trotzdem rot I dia Kanouna  
zuviel Sport isch ou nit g'sund.





Reguliera hoäßt döis Zauberwort  
isch in ins'r Gmua in aller Munde  
Olma, Holzplatz und sou fort  
viel diskutiirt in mancher Runde.

Kluavenedig Fliaß ma nennt  
nit earsch seit ma Kanal hat groba  
zwar kuar an Gondolieri kennt  
und ou kuan Markusdom miar hoba.

Dafür schwirra bei ins gnua Tauba  
was mancha Bitt nit heara kenna  
haltet ins'r Doarf decht sauba  
daß d'Leit si nit im Gatsch verrenna.

An ondra Vogl 's wörtli nimmt  
an Schmutzfink muaß döis gwesa sei  
dia Mistlaguna, was do schwimmt  
muaß ear v'rrauma und sall glei.

Im Fasnachtskomitee sei'r Schupfa  
da miaschta Foserplotta sei verstaue  
nu Schloß und Riegl muaß er schnupfa  
hat gar kuan Skrupl, hat's zammg'kaut.

Hat dia Plotta kurz entwendet  
daß ma im Misch nit kon v'rsinka  
als Unterlag hat ears v'rwendet  
so was tuat zum Himmel stinka.



Daß dia Leit nit sötta schnobla  
bringt er sie retour schua wieder  
sauber putzt ear nu dia Gobla  
und vielleicht ou sei Gefieder.

I such a Spur zum nägschta Haus  
auf ma Bankla hock I nied'r  
simulier, isch döis an Graus  
daß mancha Leit nu sei sou zwid'r.





Jed's Jahr fliaht dear Stommtisch Zoll  
für a Wocha auf dia Baleara  
weil es tuat dem Körper wohl  
döis Schwimma und döis Mopedfohra.

A Sunnabad si ou ma gönnt  
da Streß vom Jahr si außaschwitzt  
d'rnach ma a paar Stindla pennt  
daß ma si d'Ouga nit v'rblitzt.

Kannt passiera bei der Fleischbeschau  
nit wöig Trichina od'r Moda  
isch knuspri, frisch und selta grau  
und hängt oft lei a ma dinnda Foda.

Nu mit döina Reiz hat ins'r Monn  
schua gar nuit auf seim Sunnahuat  
hockt am Tresa, sou long ear kann  
weil döis G'söff schmeckt souv'l guat.

A paar Bier ear ochaschwänzt  
und ou Sangria ouna Glump  
und bei Campari ear fescht glänzt  
bis ear müad isch, ins'r Lump.

Ear si zruggschleppt in's Hotel  
auf woacha Knia, sou daß ear fluacht  
da Schlüssel braucht ear nou schnell  
d'r Rezeptionischt v'rgebli suacht.



Tourischtafreindli wia dear isch  
ruckt dear dem Problem zu Leibe  
fischt do aus dem löschtä Tisch  
da Universalschlüss'1 für dia Bleibe.

Aufwärts iatz dear Lift schua surrt  
haltet z'fria, im zehnta Stock  
döin Irrtum unbemerkt, ear kurrt  
sperr off dös Zimmer, wou I flock.

Gesagt, getan und sou passiert's  
a Frau im Rohbau hat ear im Bild  
dia kreischt und schimpft und ou verliert's  
Geduld, oschtat fuchsteiflswild.

Beim Weitergang zur nägschta Tür  
da muaß I schua a bißla schmunzla  
weil zeh und elf sou kimmt miar vir  
an Unterschied isch ou bei Runzla.





Wenn d'r Himmel öffnet d'Schleisa  
geit's Katastropha ab und zua  
wenn d'Wildbach Material mitreißa  
hat d'Fuirwehr oft zum Tia grad gnua.

Im Kaller steckt nu Schlamm und Dreck  
ou d'Straßa sei oft gonz v'rsaut  
und muart's sogar a Brugga weck  
sou weard dear Bach gonz schnell verbaut.

Sou ähnli seta hondla d'Baura  
wenn d'Sur vom Mist im Doarf umarinnt  
für d'Mistlög mocha hoacha Maura  
daß dia Maleer nit außakinnt.

Nach togelongem storka Rega  
hat döis Problem ou ins'r Monn  
dear Gatsch tuat si voar'n Ingang lega  
daß ear foscht in's Haus nit kann.


Nu hot ma nou kuan Geistesblitz  
wia ear an Zuagong kann si bouhna  
2 Schlepper hat ear, sou an Witz  
nu kann ma holt det drin nit wouhna.

Uan kann I für a Boot intauscha  
hat ear si kurz nou übrlegt  
was tata ab'r d'Leit da plauscha  
wenn a Kapitän döis Doarfbild prägt.



Scholtafla und an Brocka Holz  
sou hat ear kenna d'ribartonza  
auf dia Idee isch ear schua stolz  
und hebt z'frieda nou sein Ronza.

Beim nägschta Haus muaß I v'rschnaufa  
souviel Treppa miar nit gfollla  
Auftritt, Intritt, sou an Haufa  
wia kann ma lei sou Stiaga schola.





An nuia Lehr kimmt in d'Fraktion  
hat si schnell do integriert  
zoagt bei da Schialer an guata Ton  
sieht nit olls sou kluakariert.

Auf Dränga vom a Gemeinderat  
ladet ear zum Schualturnier  
voar dem Kiarchti isch nit z'spat  
und Gald bringt's ou dem Klubkassier.

Weil viel g'front hat dear Verei  
für döin wunderschiana Platz  
und sou muant halt uana lei  
daß dia ausschenka für die Katz.

Dia earschta Mätsch sei schua Geschichte  
gach trudlt dear Direktor on  
und glei fongt ear on zum Dichta  
warum ear isch sou spat heind dron.

Auf an Berg isch ear nou gonga  
schua voar'm earschta Sunnastrahl  
ihn hat uafach packt s'Vrlonga  
bei Moargatsluft an Blick ins Tal.


Und wia ear hatscht d'moch retour  
dia Frau isch weg, dia Haustür g'sperrt  
d'r Autoschlüssel hängt im Flur  
so kimmt ear nit zu seim Gefährt.



An Schlüssel steckt in Nachbar's Woga  
nu isch d'r sall grad ou v'rschwunda  
ihn tuat schua döis Gwissa ploga  
bis dia richti Löisi hat ear gfunda.

Döis fahrbereite Auto muaß ear liesa  
weil ear isch ja sou schua z'spat  
da Nachbar weard's woll nit v'rdriaßa  
wenn dear 3 Stund kuan Korra hat.

'S Schulhaus muaß I schnell v'rlossa  
wink dem Direktor mit d'r Ruata  
wenn I a Zeignis miascht v'rfossa  
krag ear Nota gwiß kua guata.





An Früschoppa isch a netta Soch  
geit nit Gmiatligr's für gwissa Leit  
und sou manch'r kimmt ersch auf a Gschmoch  
wenn für 's Mittag war long schua Zeit.

Ab'r was isch schua a saftigs Schnitzli  
göig an Huangart was sou g'wöisa isch  
und lusti, ou a unanständis Witzli  
wenn ou 's Weibli kocht am Tisch.

D'rzählt weard viel va Viech und Stall  
v'r Arbeit und v'r Politik  
nu d'r Zoag'r draht si ollemal  
und triab'r scheint schua mancher Blick.

Sou isch's passiert amol im Zoll  
a Mannli stupft schua sein Schafför  
nu dear fühlt si nou grad pudlwohl  
weil a kalt'r Schmaus isch kua Malör.

Döis Mannli söit, weil's ihm halt reicht  
mei Frau kocht heind an Hosabrota  
dear isch sou groaß, ear longt gonz leicht  
für ins'ra beada laara Krotta.

Sofort hat g'wirkt, döis Argument  
d'r Schafför iatz schnell si pfiat  
döis isch a Schonz für meina Zähnt  
und deswöiga er an Plan ausbriat.



Dia Straß isch haal im Wasserries  
ear spricht: „Isch g’scheiter I drah um  
steig aus und mach it sou a G’fries  
miar giah z’Fuaß döis kurze Drum“.

Kaum steht döis Mannli voar d’r Tir  
traut si döis Schlitzohr wied’r fohra  
an Hosabrota und a Bier  
da braucht ear niamad sinsch im Bora.

Serviert isch schua dia Köstlichkeit  
drum isch döis Bratli glei v’rschlunga  
laara Taller weit und breit  
wia ins’r Mannli kimmt iatz g’sprunga.

Zum nägschta Haus tua I mi ploga  
tuat mi ab’r nit v’rdriaßa  
weil an Jager mit ma laara Moga  
salber kannt si eppas schiaßa.



Umbaut weard dear Gogler Stall  
daß d'Arbeit isch nit mia dear Streß  
kua Knottla geit's in sou am Fall  
lei glänza muaß dear g'strieglat Dress.

Döis faule Holz weard aussagrissa  
dia Gmuapartie voar Tür hat's bracht  
olls hat ma auf an Haufa g'schmissa  
und a Fuirli ou entfacht.

Gschwind'r loufats maschinell  
hot ma si do übrlegt  
d'r Unimog isch glei zur Stell  
fiaht Fuar um Fuar gonz unentwegt.

Kippat halt döis Glump in d'Gluat  
daß ma wianí Orbat hot  
a paarmal ischas gonga guat  
bis döis Fuir am Bremsschlauch nogt.

Dia Brems, dia steckt iatz stuakeif zua  
d'r Fohrer drum kimmt nit vom Fleck  
scholtet ouna Roscht und Rua  
dia Splitterei hot gar kuan Zweck.

Unbarmherzi fressa d'Flomma  
an Unimog schmort in d'r Höll  
d'r Schafför kannt ols v'rdomma  
bis an Löschrupp isch zur Stell.



D'r Bürgermuascht'r hot kua Fröid  
befiehlt dia Leitla zum Rapport  
sei Wuat hei si lei longsom g'löit  
wöig am Unimog v'rsuachta Mord.

S' nägschte Haus tua I onziela  
zünd miar a Zigrettli on  
sött zwor mit dem Fuir nit spiela  
weil's oftramol blöid ausgia kann.



D'Fliaßr Fuirwehr muaß I loubä  
geit im Ernstfoll kaum an Wickl  
muaß schua ou gonz fleißi prouba  
daß sie isch, wenn's brennt, ou Pickl.

A Proub im Schloß isch ong'setzt heind  
an C-Alarm weard simuliert  
dia Sicht, isch dear greaschte Feind  
weil d'Neblmaschi fescht zirkuliert.

A Leina braucht's zur Sicherheit  
daß ma si guat konn orientiera  
dia Burg weard g'stürmt in kurzer Zeit  
ouna da Schloßhear z'informiera.

Nu d'Leina hot si blöd v'rhängt  
in da Enda vo da Krickla  
drum hat's ou dia Trophäa g'sprengt  
auf dem Boda in viel Stickla.

Begeischtert isch der Schloßhear nit  
daß d'Fuirwehr in sei'r Burg umspukt  
hot ab'r nach manch'r Bitt  
olla Ouga nou zuadrukt.

Zum nägschta Haus schlauch I mi weiter  
luahn zuacha zu dem Brunnarond  
weil heind bin I an orma Heiter  
löscha muaß I schnell mein Brond.



Jo döis Fliaßar Hüttafescht  
isch bekohnt schua seit viel Johra  
bürschtlt weard bis ollerlescht  
söt mit da Kröta ou it spora.

Uar hot si g'füht do pudelwohl  
hot g'schunklt und ou Liadla g'sunga  
und wia ear wor sou holba voll  
hot ear si auf sei Radli g'schwunga.

Bis ins Doarf isch gonz guat gonga  
muaß zuachaschauga nou beim Kumpl  
weil ihn packt hot döis V'rlonga  
noch dia nägschta Alko-Pumpl.

Iatz tret I huamwearts, war decht g'locht  
sou hot ear voar si hea nou g'allt  
in d'r Traubakurva hot's holt krocht  
und ear seglt in Asphalt.

Hilf isch rasch an Ort und Stell  
richta 's Mannli wied'r au  
und ear trachtet, daß ear schnell  
huamkimmt zu seir netta Frau.

A paar Tog tuat ear nou wonka  
weah tuat's ihm bei jedem Schritt  
hot da Helfer wölla donka  
nu bei wem, döis woaß ear nit.

Zum nägschta Haus muaß I iatz treta  
hoff gonz fescht, daß mi nit schmeißt  
weil I gloub, I tat foscht wetta  
daß meina Kunda sall nit beißt.



D'r Stommtisch Zoll an Urlaub buacht  
oll Johr amol ons blaue Meer  
6 Monat voarhea weard schua gsuacht  
daß döis Umfeld paßt und ou döis Flair.

Gnuag Tickets lot ma reserviera  
daß jeder mit därf auf dia Roas  
im Noatfall kannt ma jo storniera  
gratis! - wenn ma's friah gnuag woaß.

Weil uam isch s'lescht Jahr blöid passiert  
2 Tog voar'm Abflug kimmt ear drau  
warum, sou weard holt spekuliert  
bleibt dear liab'r d'rhuam bei seiner Frau.

Hear im Haus bin I, sall gloubat lei  
z'rstreit ear olla dia bedenka  
s'nägscht Johr bin I live dabei  
s'Gald tua I döismal nit v'rschenka.

Nu ischas wied'r 's gleiche Liad  
dia weite Welt kann ihn nit locka  
im Urlaub weard ma lei sou miad  
bleibt liab'r in d'r Stuba hocka.

Onköima beim, leschta Haus  
troum I va Malediva und Seychella  
an –Last Minute Flug-, sall gang si aus  
weil d'Hälfte ondra zohla sella.



Donka mecht I döina Schora  
was heind köima sei auf Fliaß  
speziell döina, dia sei weithea gfohra  
um berieselt z'weara va meim Griaß.

Vielleicht hot ou da Wund'r geweckt  
weil g'wöhlt an roata Inschenör miar hoba  
und d'r Vize isch gor Architekt  
wölla dia gonz Fliaß umgroba?

Drunt im Tal kannt ma sall denka  
bei dem Krawall und souviel Dreck  
sou manch'r Kran tuat si do schwenka  
do bleibt diar jo die Spucke weck.

Gallmigg'r Brugga -lei ua Spur  
schauga muß I do gonz STRENG  
zwoa Gemeinderäte gia auf Kur  
weil do ischa's für dia viel z'eng.

Viel Socha weara deponiert  
im Zoll und in d'r Runserau  
d'r Staat mit Pickerln si saniert  
daß Londegg nit d'rstickt im Stau.

D'Anrainer sei auf Barrikada g'stiega  
göig dia Südumföhrung durch döis Loch  
hot nit gnutzt, drum weard iatz g'schwiega  
ou dia Griana troga döis schwar Joch.



Gerüchteweis tia ma schua im Gemeindesaal  
berotiga, oub's war nit s'Dimmscht  
aufgreifa sött da Pillar Fall  
gonz Fliaß söll keara zum Bezirk Imscht.

War jo wurscht bei offna Grenza  
wenn ma sall beschliaßa tat  
und als Vorbild tuat schua glänza  
dear Naturpark Kaunergrat.

Nit gfollla hot döis Projekt da Baura;  
Söigasa weara gwetzt im Nu  
und sou stiah sie wia a Maura  
d'rgögt wia bei'r Agenda v'r EU.

A nuis Doarfzentrum weard ou baut  
mit Cafe und Drum und Dron  
und öis weara Stimma laut  
daß ma drinn ou wundra kann.

„D'r Museumsverein, dear breicht viel Platz“  
söit d'r Obmonn unumwunda  
„miar groba jo nach jedem Schatz  
vielleicht weard z'Fliaß an Ötzi gfunda“.

D'r Birgermuastar söit: „Für den Foll  
hoba voargsoargt miar jo schua  
d'r Kiahlraum vom Schlachthof drunt im Zoll  
isch prädeschtiniert für Haut und Bua“.



Reguliert weard überall  
sou ou d'Recht'r vo da Olma  
isch nit jedem Baur sein Fall  
bringt sou manchen auf dia Polma.

I gloub, I hon enk gnuag d'rzöihlt  
va da wilda leschta Johra  
hon heind viel z'viel Zeit v'rtröilt  
muaß gach zrugg ins Postamt fohra.

V'rgeblich weard's auf Gschichtla worta  
wöig Kind'rfosching oud'r sou  
I spiel nit mit zinkta Korta  
sall isch unter meim Niveau.

Pfiat di Gott sag I iatz enk  
bedonk mi nou für dia Geduld  
in 4 Jahr, sou I miar denk  
steh I vielleicht wieder on dem Pult.

Öis derfats schua nou bei ins bleiba  
söttats on da Standla koschta  
tiat da Schnaps in d'Gurgla reiba  
daß sie konn gar nia v'rroschta.

Für den Inhalt verantwortlich  
Fasnachtkomitee Fließ